



Dispela stori i kam long infomesen ofisa, Tekura Agelavu, em i bin poromanim Praim Minista long lukluk raun insait long Indonesia. Em i rait i go olsem:

Taim smokbalus bilong mipela i kam daun long bikpela ples balus bilong Jakarta long Indonesia, mi pilim samting i no stret.

Orait, nau yu lukim pes 3 na stori i go moa.

LUKIM INSAIT

Watpo Go Long Skul . .	3
Somare Long Indonesia	3
Dokta Kisim Prais	4
Lo Pasim Plisman	5
Provinsal Gavman	6
Morobe Grup Win	7
Saten Hailans	12
Wara Ranim Pam. . . .	13
Fantom	14

SOMARE LONG INDONESIA



Man bilong brukim bikbus tru

BILONG OL TUMBUNA

Mista Buaki Singeri, memba bilong Kabwum, i bin mosen long palamen long wanpela aidia bilong pasim ol loman i winim setifiket bai ol i mas i skul 12 mun olgeta long ol pasin bilong lo bilong ol tumbuna. Dispela pasin i stap nabaut long olgeta ples bilong PNG na i mobeta, long tingting bilong Mista Singeri, sapos ol dispela yangpela manmeri i bin kisim setifiket long lo long Yunivesiti, i go sindaun long ples na long bus na painimautim ol tingting bilong ol lapun na ol pipel bilong bipo.

Mista Ebia Olewale, em Minista bilong Jastis, em tu i bihainim dispela tingting bilong Mista Singeri, na gavman tu i laikim. I tru, bikos ol loman i mas skul wan yia moa long pasin bilong ol lo bilong ples yumi mas wet bilong kisim moa lokal loman.



Long Melbourne long 29 Oktoba wanpela bikpela man bilong Papua Niugini bilong bipo i dai pinis. Em i Mista J. K. McCarthy.


Mista McCarthy i bin wok moa olsem 40 yia long Papua Niugini na arapela hap bilong Pasifik. Em i kamap long PNG long 1927 na i bin opim planti nupela hap bilong Hailans na Sepik na planti arapela ples long bikbus tru. Wanpela taim ol busman wantaim banara i bin banisim patrol bilong em, na ol i sutim em. Em i bin raitim tupela buk na i stori long ol dispela taim bipo long woa. Bihain gen em i kam bek na i stap kiap long Hailans.

Mista McCarthy em i man i save moa long penim olkain piksa. Hia mipela i soim wanpela em i bin droim bilong WANTOK niuspepa. Em i bin mekim long las taim ol i gat ileksen bilong soim olsem wanem ol man i ran i laik kisim sia insait long haus asembli. Bihain long wan mun samting, dispela resis i kirap gen na olsem dispela piksa i kisim mak gen.

Papua Niugini i tok sore long Misis McCarthy na mipela i tok amamas long Mista McCarthy. Planti rot Papua Niugini i bihainim nau, em i brukim bus bilong statim. Tenkyu long em.

* Poto long lephan i soim Kiap Makati taim em i patrol long bus wantaim wanpela plisboi bilong bipo tru.

* Daunbilo hia i wanpela piksa Makati i bin droim. Em i save pinis long pasin bilong olgeta ileksen.





BILONG WANEM GO LONG SKUL?

Nupela skulyia i bigin pinis. I gat planti nupela sumatin i stat nau long go long skul. Planti i kam bek pinis long skul. Na planti tu nau i pinis long skul.

Ating yu save, tude sapos i gat 3-pela boi o meri i bin winim praimer o komyuniti skul, wanpela tasol bilong dispela 3-pela inap long go long haikul. Na arapela tupela bai mekim wanem samting?

Dispela em i bikpela wari bilong olgeta papamama. Na planti man tumas i save tok: em i asua bilong edukesen dipatmen. Na ol i kros long edukesen dipatmen.

Tasol dispela i no tru. Em i asua bilong komyuniti. Em i min, olgeta papamama na olgeta bikpela manmeri bilong ples i mas insait na wok na tingting long stretim dispela wari. Taim skul i kirap namba wan taim, komyuniti yet - em olgeta pipel long ples i bin bung wantaim na wokim haus skul na helpim tisa na salim ol manki i kam long skul na baim skul fi bilong ol. Ol i mekim gut tru. Ol i bung wok wantaim.

Orait. Tasol ol i no ken ting, orait wok bilong ol i pinis nau. Haus skul i sanap pinis. Nogat. Nau ol i mas bihainim dispela wok bilong ol tisa na lukim sapos ol samting i ran gut o nogat. Na sapos nogat, ol i mas traim helpim tisa.

Wanpela bikpela as bilong trabel em hia: komyuniti, em ol bikpela manmeri long ples, ol i mas gat stretpela aidia na tingting bilong wok tru bilong ol skul. Ol pipel yet i mas wan tingting long dispela samting: bilong wanem mipela i salim ol manki i go long skul?

Yu ting wanem? Yu ting as bilong olgeta wok long skul em i bilong givim gutpela save long wan wan sumatin, bai em i ken painim gutpela wok na bikpela mani? Maski long komyuniti. Olgeta man i mas tingting long em yet na long poket bilong em. Sapos yu ting olsem, orait, yu ting kranki.

Kabinet bilong Praim Minista i bin mosen long wanpela 5 yia plen bilong edukesen long yia i go pinis. Na as tok tru bilong dispela plen em hia: Yumi mas skulim ol sumatin long kamap gutpela memba bilong komyuniti bilong em.

Orait. Sumatin em inap kamap gutpela komuniti memba sapos em i winim planti mani, na em i no wari liklik long helpim ol arapela man long ples? Nogat. Kamap gutpela komyuniti memba em i min em i mas kisim dispela kain save i ken mekim go het grup o lain o ples o komyuniti bilong em.

Edukesen dipatmen i laikim tumas, na provinsal gavman tu i laikim tumas bai ol lida na tisa, na kaunsila, na hetman bilong olkain gavman dipatmen, na ol bisnisman i insait wantaim em. .na tingting tru long pasin bilong ranim ol skul na program bilong em. Tasol pastaim tru . .ol dispela lida i mas tingting stret long dispela samting: watpo ol sumatin i go long skul. Sapos ol i longlong nabaut long dispela samting, bai olgeta arapela tingting i popaia.

Wantaim Somare long Indonesia

Praim Minista, Rait Honerabel Michael Somare, na meri bilong em Veronika na ol bikman bilong Papua Niugini i bin kisim bikpela ona tru taim ol i lusim balus i go ausait. Ol i wokabaut long longpela retpela kapet o tepik, longpela bilong em inap 150 mita. Em pasin bilong welkamim bikpela hetman bilong wanpela kantri.

Na bikpela ben bilong ol soldia bilong Indonesia i pilaim nesenel song bilong Papua Niugini, em ARISE ALL YOU SONS. Bihain 19 bikpela gan bilong woa i pairap wan wan long salutim Michael Somare. Orait nau ol bikpela ka bilong gavman bilong Indonesia i kisim Michael Somare na lain bilong em na bringim ol i go long hotel bilong ol.

OL RIPOTA I GAT ASUA

Na mipela niusman na ripota, mipela i wet i wet i stap. Na i no gat wanpela man o wanpela ka i kisim mipela i go. Mipela i pilim wanpis tru.

Long biknait tru tasol

mipela i bin painimaut as bilong dispela pasin bilong ol Indonesia. Em hia: ol i gat lo, olgeta niusman i mas putim naispela klos - em trausis na saket i wan-kain na wanmak, em ol i kolim siut. Tasol mipela i no gat sampela. Mipela niusman na ripota i bin kamap olsem mipela i save raun long PNG, long longpela trausis tasol na naispela siot i no gat nektai. Na saket, maski.

Olabo, Mista Robin Kumaina bilong dipatmen bilong Praim Minista i hatwok long helpim mipela. Em i painim painim na em i painim sampela siut bilong mipela wan wan. Tasol sampela siut i bikpela tumas, na sampela i smolpela tumas. Tasol maski, mipela ripota i pasim nating. Na ating sampela pipel i bin lap long lukim mipela.

TINGTING BILONG SOMARE

Mista Somare i bin tok, em i bin go long Indonesia bilong painimaut na lukim na pilim: ol Indonesia i wanem kain pipel, na tu

em i laik lukim long ai bilong em yet: ol i save mekim wanem kain samting.

Olsem na ol Indonesia i wok long soim em olkain samting, bai em i ken pilim ol i save tumas long planti samting, na ol i bikpela kantri, na ol i save mekim planti kain samting.

OL PROMIS BILONG INDONESIA

Gavman bilong Indonesia i promisim Papua Niugini, em i laik pren wantaim mipela. Em i tok, Papua Niugini i no ken pret na ting ol Indonesia i laik kam kisim dispela hap bilong bikpela ailan Niugini. Nogat. Na tu gavman bilong ol i tok, em i laik bai yumi mekim moa wok bisnis namel long yumitupela.

(Lukim pes 10)

Poto i soim Mista Tony Siaguru bilong Dipatmen bilong Foren Afeas na Tret, Praim Minista Michael Somare, na Presiden Suharto bilong Indonesia.



PAS I KAM LONG OL PIPEL

PIPEL I ASKIM GAVMAN MAN

Dia Edita - Hia mi gat wampela bikpela wari long ol bikman bilong Haus ov Asembli.

Mi ting yupela i no mekim pasin bilong ranim nupela kantri. Yupela i no save askim ol pipel pastaim long wanem lo na aidia i gupela long ol. Orait yupela i ken mekim ol i kamap lo.

Na tu yupela yet i ken save olsem, i no long laik bilong yu wan wan yet i kisim insait long Haus ov Asembli. Nogat. Ol pipel yet i votim yu bilong yu sanap olsem maus bilong ol.

Na tu mipela ol pipel i save olsem gavman em i pipel. Wanem samting pipel i ritim, em gavman i save helpim. Wampela bikpela samting em kantri bilong mipela i demokretik kantri.

Olsem olgeta pipel i ken yusim fri wil bilong ol long tok: yes o no long samting i gupela o i nogut.

Yes ol bikman, watpo mi toktok long dispela samting? Mi harim wampela samting i no stret tru ya. Bikman bilong edukesen i tok: Rilijin i mas pinis long ol haikul.

Sori tru, wantok, yu tingting long taim yu statim skul bilong yu. Yu bin lainim tok bilong God Papa liklik tu o nogat olgeta?

Mi no ting wampela man o meri bilong dispela kantri i no bin skul liklik long skul bilong God. Bikos mipela i kristen kantri, olsem na luk bilong mi long dispela tok i olsem: Dispela em i no edukesen sistem bilong kantri bilong yumi nogat.

Dispela sistem i kam long ovasis kantri. Sapos mipela i tok maski long God, mi no ting bai wampela samting i ken ran stret. nogat tru, bikos rilijin wampela samting tasol i ken stiaim we bilong laip bilong man long olgeta hap long graun.

*Nau yet yumi ken apim ai na yau, lukim na harim wanem ol trabel i kamap nabaut long olgeta hap bilong kantri long brukim stua na stilim o bagarapim ol samting nabaut.

As bilong dispela trabel mi ken tok, em ol i no kisim gupela rilijin edukesen. Insait long rilijin mipela ol kristen i save olsem:

Samting i kamap long hatwok bilong narapela man em i samting bilong em. Na sapos i bilong yu, em i bilong yu stret.

Tasol dispela ol boi i rasikal nabaut ol i no gat save, ol i go fowed tasol.

Yes, bikman bilong edukesen, sapos yu ting rilijin i westim taim bilong ol narapela sabjek bilong skul, em i orait, yu ken traim rausim rilijin na lukim, bai wanem kain man na meri kamap long kantri bilong yumi, gupela o nogut?

Em tasol liklik wari bilong mi. Larry Sumpuk, Timbunke/E.S.P.

SKUL LONG OL TISA

Dia Edita - Mi laik mekim liklik toktok long ol tisa bilong yumi husat i save kisim ol gret 6 skul pikinini long go lukluk raun long ol taun. Em ol i kolim "ekskesen".

Em i wampela gupela aidia o tingting. Long wanem, ol i ken wokim o bihainim sampela we bilong wok bisnis long taim ol i lusim skul long gret 6.

Tasol mi ting olsem em i no gupela taim tumas, sapos yu wokim kain pasin olsem long las yia bilong ol pikinini long skul. Long wanem mipela i no laik ol pikinini i gat tupela tingting. Bai ol i stap long taun o go bek long ples bihain long gret 6. Mi ting ol papamama i laik ol i mas go bek long ples na helpim ol. Long wanem, planti bilong ol gret 6 skul manki i no save go long haikul.

Planti taim mipela i save harim olsem, ol pipel husat i mekim trabel long taun, em ol lain i no inap go skul moa. Ol i save mekim kain pasin olsem stil, pait na spakpasia. Em rong bilong husat, ol pikinini o ol tisa bilong yumi? Mi ting olsem ating em rong bilong ol tisa. Bikos ol tisa bilong yumi i lukluk long wan sait tasol, em gupela sait, na ol i no lukluk long sait nogut em bai bagarapim tingting bilong ol manki.

Sapos ol pikinini i go raun long taun, na lukim planti gupela samting long taun, orait sapos em i no inap go long haikul, em i laik go stap wantaim wantok long taun, long wanem, i gat planti gupela samting. Taim em i stap no gat wok, tasol em i laikim ol samting, orait, em i kisim nau trabel.

Tingting bilong mi i go olsem, ating i gut moa sapos ol tisa bilong mipela i ken mekim lukluk raun long taun long wampela holide long taim ol pikinini i stap long gret 5, na i no long gret 6. Em bai ol pikinini i gat wan moa yia long wok hat long skul na winim gret 6 na go long haikul. Na bihain, mekim olkain wok em ol i lukim long taun na ol i gat laik long en. Wok olsem, PIR o ami, didiman, NBC, na planti moa, em bilong ol pikinini i go long haikul.

Ating i gupela long ol tisa bilong mipela i mas tingting tu sait na i no wansait, long dispela we bai mipela bilip olsem, yes ol tisa i givim gupela save tru na i no long rit tasol.

Em tasol liklik tingting bilong mi, na mi no kros. Sapos yu husat susa o brata i belhevi o bel kros stretim long Wantok.

Saul A. Kauminja, Ambunti/E.S.P.

MASKI TAMBUIM SINGSING

Dia Edita - Mi laik bekim pas bilong brata ya S. Posey Sabastian bilong Gasmata long hap bilong Wes Nu Briten Provins.

Yes brata, yu bin raitim pas na tok, Gavman i mas pasim olgeta liklik sosol nait i kamap long ol ples kanaka insait long Papua Niugini.

Long tingting bilong mi, mi ting em i no stret, long wanem PNG em i no wampela komyunis kantri, em i wampela fri kantri. Ating yu yet i gat dispela kain rabis tingting.

Mi bilong Korobosea Viles stret long hap bilong Papua insait long Sentral Provins. Long ples mipela i gat kaunsila bilong mipela yet, tasol em i no gat dispela tingting. Oltaim em

i save tok, musik em i wampela samting bilong mekim ol pipel i amamas long wan wan ples kanaka bilong ol.

Pilai gita i no save bagarapim gupela sindaun bilong ol pipel long ples, em i samting bilong mekim ol i amamas na i stap. Em i wankain olsem ol pipel i sindaun bung na harim ol gupela pilai singsing gita, na singsing tumbuna long radio bilong ol yet.

I no Korobosea tasol i gat dispela kain amamas, ol viles olsem KilaKila, Vabukori, Hanuabada na Baruni tu i gat dispela lo o pasin bilong pilai gita long ol sosol nait. Na mi yet mi ting em i gupela, na ol pipel i laikim tru.

So em tasol liklik wari bilong mi, sapos yu ting em i no tru, orait, rait tasol i go long Wantok Niuspepa na bai mi ken lukim wari bilong yu. Tenkyu.

M. Madline Nuana, Korobosea C.P.



KAUNSI MAS PAIT

Dia Edita - O yes, mi gat liklik wari tasol bilong askim ol kaunsil.

Wari bilong mi i go olsem: Mi laik askim ol kaunsil em ol i save sanap long ai bilong ol pipel, na ol save bekim bikmaus na mauswara long ol.

Na ol yet i save tok olsem, ol yet i bosim ol na wok tu. Em ol dispela lain mauswara em ol kaunsil...

Ol i no save tingting o i no save lukluk liklik long ol wok insait long wan wan provins bilong ol yet.

Mi yet mi ting olsem ol i save go oltaim long miting bilong ol, na ol i pait hat tru long pe bilong ol meri tasol.

Long lukluk bilong mi yet, mi ting pait long wok i no gat na i no gat olgeta.

Bikos long lukluk bilong mi, Hoskins Sab Provins i bus tru. Ol kanaka i save kam pilai long olgeta Sarere na Sande, na ol i save tromoi ol emti botol nabaut long pilai graun. Na ol bikpela diwai i kamap insait long stesin, na stesin i luk doti na i bus nabaut olgeta.

Bikos ol dispela kaunsil bilong Hoskins Sab Provins ol i no save pait hat long ol pipel bilong ol long ol kain wok olsem.

Olsem nau ol pipel i slip nabaut na les nabaut long ol wok bilong ol insait long ol provins bilong ol.

Olsem nau lain kokonas bilong ol i bus na ol pekpek bilong pik i pulap long ples bilong ol. Ol yangpela man na meri ol i wok long bilas na hambak nabaut na les long wok gaden.

Na olgeta nait ol i tingting tasol long sosol nait nana mekim trabel nabaut.

Mi yet mi ting ol dispela kain samting olsem i save klosim na brukim sindaun bilong yumi. Na tu long kros na pait na trabel i kam insait long ol provins bilong yumi.

Na no ken kilim i dai narapela man. Em ol dispela kain wok olsem ol lida long ol ples na ol komiti bilong ol kaunsil, na tu ol kaunsil tu i mas was na lukautim gut long wan wan provins bilong yumi. Nogut dispela kain pasin i kam insait long provins bilong yumi.


Em tasol ol wantok long dispela hap wari bilong mi, mi salim i go long Wantok Nius bai yupela i lukim.

Na sapos yu husat kaunsil yu gat kros, orait, rait tasol i go long lapun wantok i stap wet tasol sapos yu salim wari bilong yu.

S. Sabastian Posey, Gasmata/W.N.B.P.

SALIM OL
PAS I KAM
LONG:

WANTOK
BOX 1982
BOROKO



Dokta kisim prais long wok long sik Kuru long PNG

Dokta Carleton Gajdusek, wampela dokta i bin mekim gupela wok insait long Papua Niugini, i bin kisim bikpela praismani inap long K50,000 samting.

Olgeta yia ol i makim sampela manmeri i bin mekim gupela wok tru long wol na i givim prais, em ol i kolim Nobel Prais, long ol. Em i bilong tenkyu long ol na bilong onaim ol long gupela wok. Na tu bai ol i eksampel long ol arapela saveman, bai ol tu i taitim bun na winim planti save moa.

Dokta Gajdusek i bin wok wantaim Dokta Zigas long Isten Hailans Provins long yia 1952 samting. Sampela dokta long Papua Niugini i bin painim wampela sik i save bagarapim ol Kukukuku pipel i no longwe long Menyamya. Em i wampela sik i go insait long kru bilong het bilong ol na i mekim ol i longlong na i dai. Nem bilong dispela sik kuru. Na Dokta Gajdusek i bin harim tok long dispela sik na i laik glasim gut na painim-

aut dispela sik i kamap we na olsem wanem yumi inap stretim.

Dokta Gajdusek em i man bilong helpim tru ol yangpela pipel. Em yet i bin kisim 14 yangpela man olsem pikinini tru bilong em. Sampela i bilong Esia, na narapela bilong Papua Niugini na Indonesia na ol arapela ailan bilong Pasifik. Taim em i flai i go long biktaun Stockholm long kantri Swiden insait long Yurop, 7-pela dispela pikinini bilong em i bin go wantaim na i hepi tru long ona i bin kamap long papa bilong ol. Dokta ya i tok long lusim ol dispela bikpela mani long skulim 21 pikinini man bilong em long ol yunivesiti na bikskul. Em i no man bilong holim dispela mani bilong em yet. Nogat.

Dokta Gajdusek em i man bilong raun long planti kantri bilong graun na skul long olkain sik bilong ol. Em i bin wok long Indonesia, Irian Jaya, India, Brasil, na Meksiko. Na em i save skrapim planti tok ples moa.

** Poto i soim Dokta Gajdusek wantaim 3-pela pikinini bilong em, ol i amamas tru long em i bin kisim bikpela Nobel Prais.*

AIR NIUGINI TOK SAVE

Air Niugini i wok long lukautim 12 moa yangpela naispela meri i gat gupela save na i laik kisim wok olsem hostes long ol balus. Hostes em i meri i lukaut long ol pasindia i flai long balus.

Meri i laik mekim wok hostes, em i mas winim Fom 4 na em i mas raitim wampela pas long Tok Inglis i go long:

Staff Manager
Air Niugini
P.O.Box 84
Port Moresby

Long dispela pas em i mas tok save long laip bilong em na save na long laik bilong em.

Wanem meri i gat laik bilong kamap hostes, mobeta em i go lukim hetman bilong Air Niugini klostu long ples bilong em na tok tok wantaim em pastaim.

Lo pasim ol plisman


Saiden Semel Buka bilong Plis Fos i bin tokaut long sampela hevi bilong ol plisman. Wampela as bilong trabel, em ol kain kain nupela lo i save kamap bilong helpim man i brukim lo. Tasol i no save helpim tumas man i bihainim lo. Na em i no stret.

Long tingting bilong Konstitusen, Papua Niugini em i fri kantri na ol pipel i mas ken sindaun gut na isi. Tasol sapos ol raskal na stilman na man nogut i raun nabaut, husat i mas pasim ol na stapim ol? Ol plisman tasol.

I no olsem plisman i gat kros na em i mekim. Nogat. Na tu i no plisman yet i wokim olkain lo. Nogat. Gavman i wokim. Ol tokman bilong pipel i stap insait long palamen, em ol i wokim. Na ol plisman i gat wok tasol long bihainim. Olsem nogut ol pipel i putim hevi long plisman.

Na yu yet, sapos yu spak na yu brukim lo na plisman i kisim yu, bihain yu no ken kirap nogut na tok nogut long plis. Em i mekim wok bilong em. Taim yu longlong long dring, o yu bagarapim samting bilong narapela man, plis i no ken larim yu mekim olsem. Watpo? Bikos ol arapela gupela man i laik sindaun gut na isi, na yu bagarapim laip bilong ol. Ol i laik stap fri. Em laik bilong ol - olsem na ol plisman i helpim ol. Taim yu no spak, yu mauswara na pairapim maus nating long plisman i bihainim dispela lo yu yet yu bin wokim.

VEGEMITE



**NAMBAWAN
KAIKAI
WANTAIM
BRET
NA BISKIT**

059P1336

Provinsal Gavman karamapim ol skul na sumatin

Bipo mipela i bin tok long olkain lo bikgavman i bin givim olgeta long han bilong provinsal gavman.

Tasol i gat planti arapela samting, bikgavman na provinsal gavman tupela wantaim i bosim. I olsem provinsal gavman i han bilong bikgavman. Bikgavman i wokim lo bilong ol dispela samting, tasol provinsal gavman i lukaut bai ol pipel bilong provins i bihainim. Ol dispela bikpela lo i wankain long wanem ol i kamap long palamen. Tasol pasin bilong mekim ol dispela lo i wok long wan wan provins i narakain; na dispela nupela we, em i samting bilong provinsal gavman bilong painimaut.

Em hia sampela wok na dipatmen we provinsal gavman i bihainim tasol lo bilong bikgavman na palamen, na em i han bilong bikgavman tasol.

- (1) long komyniti na rural developmen
- (2) long wok fama na wok bulmakau
- (3) long wok bilong groim na painim ol pis
- (4) long dipatmen bilong helt
- (5) ol pablik wok bilong helpim go het bilong provins
- (6) long lukaut long pasin bilong wok bisnis na long ol wok bilong kirapim nupela kampani
- (7) long bosim ol haikul na teknikal skul
- (8) long ol wok turis
- (9) long wok transpot na olgeta trak na samting bilong transpot dipatmen
- (10) long pasin bilong wokim gut ol taun
- (11) long bosim ol graun na developmen bilong graun
- (12) long bosim ol wok timba
- (13) long bosim famili na ol lo bilong marit, na ol lo bilong katim marit, na bilong tilimautim ol pikinini bihain kot i bin katim marit pinis.
- (14) long bosim ol kot
- (15) long bosim redio stesin na ol arapela we bilong givim tok save, olsem niuspepa
- (16) long bosim ol pasin na bris bilong ol sip
- (17) long bosim olgeta wok balus
- (18) long bosim ol lo bilong wok na pe
- (19) long bosim ol maket na lo bilong baim na salim ol samting
- (20) long bosim ol gol na wel na samting olsem



Nupela skul yia i laik stat nau, na sampela hetman bilong dipatmen bilong edukesen i wari na i bin givim gutpela tingting bilong stiaim ol provinsial edukesen lida. Mista Alkan Tololo, em Seketeri bilong Edukesen, na Mista Geno Roakeina, helpman bilong em, tupela i bin lukaut.

Tupela i tok, em i tru nau ol provinsal gavman inap long bosim ol praimeri skul. Tasol ol i mas lukaut gut. Nogut wan wan provins na hetman bi-

long edukesen dipatmen bilong em nau i kirap senisim nabaut pasin bilong ol skul bilong ol. Nogut wanpela provins i skul inap 6 yia na narapela gen inap 8 yia. Na long sampela provins ol i skul long wanpela samting na long narapela provins ol i skul long narapela samting gen. Sapos i olsem bai ol sumatin i hatwok long winim ekseminesen bilong go insait long ol haikul.

Mista Tololo i tok, nogut yumi Papua Niugini i kisim pasin bilong ol provins bi-

long Australia, we ol i gat kain kain buk na kain kain pasin long skul bilong wan wan provins. Na ekseminesen bilong wan wan provins i narakain tu.

Na Mista Roakeina i tok, i gut ol provinsial edukesen hetman i bung na i orait long wanem kain skul yumi mas givim long olgeta provins. I orait, wan wan provins i givim tu sampela kain save bilong provins bilong em stret. Tasol olgeta provins i mas gat sampela samting em i tis i wankain long olgeta provins.

WANTOK

Papua New Guineans' own national weekly in Melanesian Pidgin.

Editorial Office:

Box 1982
Boroko
Papua New Guinea
Phone: 25.2214

Branch Offices:

Box 396
Wewak
Phone: 86.2488

Box 90
Rabaul
Phone: 92.1355

Box 111
Wabag.


Printed by Wirui Press in Wewak.
Phone: 86.2479.

Overseas Advertising Representative:

Kevin Engel
8 Duraba Pl.
Caringbah (2229)
Phone: 525.6263

Subscription rate:
Annual: K8.00.

Buy the brand you can trust



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

maxell LN C90

Low Noise Cassette Tape

P.O. Box 673, Madang
Phone: 822445

P.O. Box 1428, Boroko
Phone: 56144

P.O. Box 63, Rabaul
Phone: 922633

P.O. Box 90, Lae
Phone: 423200

Mista Boyamo Sali, Minista bilong Pramerit Indastri, (em bipo yumi kolim wok didiman), em i amamas tru long wanpela grup pipel long ilektorat bilong em long Morobe Provins, long wanem Viles Ekonomik Developmen Fan bilong gavman i bin givim K88,808 kina long ol. Nem bilong dispela kampani, em Finschhafen Kabwum Konstaksen Kampani. Na ol i mekim bikpela wok bilong wokim rot na lukautim ol gut long hap bilong ol.

Bikpela lain i bin putim planti mani insait long dispela kampani em ol i kolim Finschhafen Kabwum Plening na Developmen Atoriti. Em i gat ol kaunsil insait long en, na olkain lotu, na olkain bisnis grup. Bai Morobe Provinsal Eria Atoriti tu na ol Lokal Gavman Kaunsil i baim sea bilong ol yet insait long dispela kampani.

Em i gupela eksampel bilong ol pipel i mekim wok bilong ol yet long go het na mekim ples na hap bilong ol i go het. Em i dispela samting ol i kolim selp relayans.

As bilong dispela tingting i olsem. Hap bilong Finschhafen na Pindiu na Siassi na Tewae - bipo oltaim i no inap go het gut, long wanem ol i no gat gupela rot samting bai ol inap i go i kam long ol pesis na maket. Na hia i gat planti samting i ken winim wan siling long ol pipel. Tasol ol inap go het olsem wanem?

Inap planti yia ol wan wan kaunsil i traim stretim dispela wari bilong ol. Tasol nogat. Gavman tu na Rural Impruvmen Program i bin traim. Em tu nogat. As bilong trabel, em long ol kain kain lain na grup pipel i no inap bung wok wantaim.


Tasol Mista Boyamo Sali, Rijonal Memba bilong dispela hap, i save pinis, i gat planti lida long dispela hap, ol i laik go het. Isi isi ol i traim traim wok gut wantaim. Na dispela nupe-la Finschhafen Kabwum Konstaksen Kampani em i namba wan eksampel bilong dispela bung wok wantaim bilong ol.

I luk olsem bai ol i kisim helpim tu long Nu Silan.

Em i namba wan taim

wok inap olsem. Wok bilong ol bai kostim planti milien kina. Ol i tingting long wokim ol rot na bris bilong sip na olkain maket na liklik faktori bilong redim kaikai i bin kam long ol gaden.

Mista Sali i tok amamas long ol lida bilong dispela grup. Na em i tok bai ol manmeri bilong Papua Niugini i lukim ol na wok bilong ol. Em i tok, gavman tu i amamas long dispela go het bilong ol. Em dispela kain pasin yet, gavman i laik lukim.



BOYAMO SALI

ATING YU SAVE.....

I gat moa long 100 puk-puk fam long PNG. Na Yunaitet Nesens i bin givim K540,00 bilong helpim go het dispela wok bilong groim pukpuk.

Sapos yu laik salim wanpela bokis kago long Wewak i go inap Lae, em i kostim wankain olsem sapos yu salim dispela bokis i go long Wewak inap long Yurop. Na Yurop i longwe moa tru.



MASKI NO GAT ROT TASOL I GAT

Yamaha Trail




Sapos yu laik raun long ol ples i no gat rot, maski, em i samting nating wantaim Yamaha Trail DT motobaik. I gat kain kain: sampela i no hevi na inap long ol meri. Na sampela gen i gat masel tru na inap long man i save spid. Maski yu laik go long wanpela ples, Yamaha inap bringim yu i go.



DT125



ELA
MOTORS LIMITED



Burns
Philp
GROUP OF COMPANIES



DT100






Man, mi laikim tru Heinz kaikai

**Heinz tasol i givim yu
kaikai i nambawan
na i redi hariap
na i kos liklik
Tingim oltaim
dispela nem Heinz**



Nau em i isi long strongim bebi

5430

Bipo tru i gat tupela brata i stap. Tupela i stap nau na bikbrata, em i marit pinis tasol liklik brata i no yet. Em i no marit.

Tupela i stap na tupela i gat wanpela gaden. Olsem na wanpela nait bikbrata i go was long pik, long gaden bilong ol. Nogut pik i go kaikai ol yam na mami bilong ol, na bikbrata i go was long sutim dispela pik.

Taim man ya i go i stap long gaden, orait, mama bilong tupela brata i stap long ples. Na i gat wanpela wel limbum tu i sanap arere long haus bilong dispela lapun mama bilong tupela brata ya.

Na dispela wel limbum tu i no bikpela o longpela, nogat. Em i liklik tru na i sotpela tasol. Long tudak nau lapun mama bilong tupela brata ya i kirap i goap antap long dispela wel limbum na wel limbum yet i go longpela tru, na i go kamap long gaden, long ples we namba wan pikinini man bilong em i stap long en.

Nau em i kamap olsem pik na em i kaikai yam na mami long gaden. Em i kaikai i go, i go na i kamap long dispela man, na man ya i laik sutim dispela pik



Stori bilong tumbuna

pela yam na mami, na bai mitupela kisim ol i go long ples bilong mi. Klostu bai mama bilong yu i kam nau. Yu mekim hariap na mitupela i go hait kwik.

Orait, man ya i harim tok bilong rat, na em i kisim sampela mami na tupela i go long ples bilong rat.

Taim tupela i go, rat i go pas na man i go bihain, tupela i go na kamap long as bilong wanpela diwai. Nem bilong dispela diwai em ton. Nau na rat i tokim man olsem, em nau bai mitupela i go antap long dispela ton em i ples bilong mi hia. Bai mitupela i go antap long dispela rop.

Tasol man i tok, mi pret long i go antap ya. Mi lukim ol bikpela binatang na mi pret. Nogut ol binatang i kaikaim mi. Tasol rat i tok, Nogat. Em ol pren bilong mi, ol i no inap kaikai yu. Olsem man i go antap pastaim na rat i go bihain. Na rat i wok long kisim mami bilong tupela i go antap long diwai.

Nau rat i tokim dispela man olsem: yu tekewe skin bilong mami na kukim i stap na bai mitupela i go sindaun ausait na was long gaden. Klostu bai mama bilong yu i kam nau.

Olsem na tupela i was i stap, i stap na tupela i lukim meri ya em i kam long gaden. Meri i go antap long wel limbum na wel limbum i go longpela tru i go kamap long gaden. Na meri i tanim olsem pik i kam kamap long gaden na em i wok long smelim olgeta hap long gaden.

Bihain em i smelim dispela rot bilong rat wantaim man i go long en. Em i bihainim i go na i kamap long as bilong diwai ya man wantaim rat i stap long en. Na meri i apim het bilong em i go antap na em i lukim pikinini bilong em i stap wantaim rat antap long diwai.

Nau man i tok, na, bipo yu kaikai brata bilong mi, nau bai yu i dai. Olsem na meri i laik traim long i go antap long diwai long kaikaim pikinini bilong em.

Taim em i go antap, ol
(Lukim neks pes.)

tasol em i no inap long winim dispela pik. Nogat. Pik i strong na i winim em na pik i kaikai dispela man.

Pik i kaikai man ya pinisim tru bodi bilong em. Na em i larim het tasol i stap long gaden. Dispela pik i no wel pik tru. Em i mama bilong tupela man ya tasol i kamap o i tanim olsem pik. Na em i go kaikaim ol dispela kaikai long gaden. Na tu em i kaikaim pinis namba wan pikinini man bilong em.

Orait, long moning tru em i go antap long dispela wel limbum na em i go bek long haus bilong em long ples. Em i tokim tambu meri bilong em, wantaim namba tu pikinini man bilong em olsem:

Yupela i go long gaden na painim dispela man, nogut pik i kaikaim em. Orait, ol i kirap na i go long gaden na ol i go painim em. Na ol i no painim wan-

pela man i stap long gaden, tasol ol i go na ol i lukim ples we pik i kaikai long en. Na ol i lukim het bilong dispela man i stap. Na ol i kisim het bilong dispela man na ol i kisim i go planim long ples.

Orait, ol i stap na wanpela taim liklik brata i tok: mi traim i go was long gaden na mi sutim dispela pik. Orait, man ya i kirap na i go long gaden na em i was i stap. Em i stap nau na em i lukim wanpela rat i slip aninit long paiawut. Olsem na man ya i laik kilim dispela rat.

Tasol dispela rot i tokim dispela man olsem. Ah yu i no ken kilim mi. Nogut bai yu i dai nau long nait, olsem brata bilong yu. Yu ting brata bilong yu, husat i kilim em. Em mama bilong yutupela tasol i kaikaim em. Man ya i harim rat i tokim em olsem, na em i no kilim rat.

Yu i go kamautim sam-

maxell


LONG LIFE BATTERIES



**For all Transistors
Torches Tape Recorders
& Record Players**

HAGEMeyer (AUSTRALASIA) B.V.

P.O. BOX 673, MADANG BOROKO P.O. BOX 1428
Phone 82 2445 Phone 25 6144
P.O. Box 63, RABAU P.O. BOX 90, LAE
Phone 92 2633 Phone 42-3200



STORI TUMBUNA

(i kam long pes 9)

binatang i wok long kaikaim em nogut tru. Na skin bilong em i solap nabaut. Longpela nait tru ol binatang i mekim save dispela meri. Na meri i no go hariap, nogat. Em i tingting olsem em i laik kaikaim tru pikinini bilong em. Tasol i no gat tru.

bilong ol i kisim sampela mami i kam long rat na i putim sampela long ol. Meri bilong brata bilong em i pulimapim kaikai na ol i go long ples. Man ya i tokim rat long i go bek long ples bilong em. Nau ol i go long ples bilong ol tu.

Em i mekim i go, i go na i tulait pinis. Long moning meri ya i go bek long gaden. Na em i go antap long wel limbun na em i go bek long haus bilong em long ples.

Taim ol i go kamap long ples, lapun mama i tokim ol olsem. Yupela boilim sampela wara na wasim mi. Na katim skin bilong mi tu. Mi i go daun long brukim paiawut na ol paiawut i pundaun na paitim nabaut skin bilong mi. Na skin bilong mi i solap, na ol i tok. Em i orait.

Long moning yet em i tokim tambu meri bilong em olsem, yupela i go long gaden na lukim dispela man. Nogut pik i kaikaim em. Olsem na meri i kirap kisim ol pikinini bilong em na ol i go long gaden.

Tasol ol yet ol i save pinis olsem. Em i giamanim ol. Nau ol i boilim wara long tupela sospen. Wanpela sospen i no hat tumas tasol narapela sospen i boil krangi tru. Na ol i wasim em long narapela sospen wara i no hat tumas.

Na ol i lukim man ya em i wok long kamautim ol yam na mami long gaden. Ol i go i stap long liklik haus, na ol pikinini bilong meri bilong brata bilong man, ol i lukim rat na ol i laik kilim em. Tasol man ya i tokim ol olsem: yupela i no ken kilim em, yupela i ting, sapos dispela rat i no gat, em bai mi i no inap stap. Nogat tru. Em bai pik i kaikaim mi pinis.

Bihain ol i kisim arapela sospen wara i hat tru na ol i kapsaitim antap long lapun mama bilong ol. Na tarangu mama ya i dai pinis. Na ol i kisim em i go na ol i planim em insait long wel arang na bihain ol i brukim paiawut na ol i kukim em na em i paia olgeta. Em tasol.

Yupela i ting papa bilong yupela, husat i kaikaim em, em mama bilong mitupela yet i kaikaim em.

Misis Magdalene Kumbili,
SSEC Arkosame/W.S.P.

Nau ol i lusim dispela rat i stap na liklik papa

Wantaim Somare long Indonesia

PROMIS BILONG PNG

Mista Somare i promisim ol Indonesia, kantri bilong mipela i no ken larim sampela man i sindaun insait long en i ken kirapim trabel long ol hap Indonesia i bosim.

Mista Somare i tok tu: mipela Papua Niugini mipela i ken lainim planti samting long bikipela kantri Indonesia, long wanem em i winim mipela long planti kain save. Na mipela i laik tu bai ol i givim sampela dispela save long mipela.

Long bikipela ailan Java Praim Minista i bin lukluk raun long sampela woksap na faktori long ples Nurtanio we ol i save wokim smolpela balus, na long faktori bilong wokim ol

katres na raifel long ples Pindad.

PLES BILONG KALSA TRU

Raita bilong dispela stori, Mista Tekura Agelavu, i skruim tok moa i go olsem: Wanpela samting mi pilim tru na lukim long Indonesia, em olgeta pipel i amamas tru long ol kalsa bilong ol na pasin bilong kantri bilong ol. Na long olgeta bikipela seremoni, yu ken lukim ol pasin tru bilong kantri Indonesia.

OL LAPUN GAT ONA

Wanpela samting long pasin bilong Indonesia, em ol olupela pipel na ol lapun i gat namba tru na i gat ona. Sapos sampela lapun i stap, ol yangpela pipel i sarap tasol i stap. Ol i no ken tok. Ol i tambu.

Wanpela ofisa i tokim mi olsem: "Mipela i amamas tru long ol yangpela pipel bilong mipela. I tru, ol i kisim olkain save bilong waitman long olgeta skul bilong mipela. Tasol ol i save sindaun wantaim mipela long ples. Maski sapos mipela lapun i mas dai. Mipela i pilim, ol yangpela pipel bilong mipela bai holim ol pasin bilong mipela yet na i givim i go long pikinini bilong ol. Ol dispela pasin bilong mipela bai i no ken lus. Nogat tru."

Mipela Papua Niugini i bin lukim na pilim tru dispela amamas long ol pasin tumbuna, long taim mipela i bin kamap long bikipela haus lotu o tempel bilong ol i kolim Borobodu tempel. Tempel ya ol tumbuna i bin wokim samting olsem 1200 yia bipo long ples (i go long neks pes)



"Coke em i samting tru"



N.G.I. INDUSTRIES LAE. AUTHORISED BOTTLERS OF COCA-COLA AND FANTA.

WANTAIM SOMARE

(i kam long pes 10)

Magelang. Em i antap moa. Na mipela i no gat inap taim long kalap i go antap long em. Na ol Indonesia i bel nogut long lukim mipela i no inap long lukim insait na ol bilas bilong dispela tempel. Na tu i gat wanpela lain manmeri bilong mekim wanpela sing-sing bilong onaim mipela i wetim mipela. Na ol i wet nating.

SAMPELA PASIN BILONG INDONESIA

Bihain mipela i lusim het taun bilong Indonesia, em Jakarta, na mipela i go kamap long narapela bik-taun Jogjakarta, nau tasol mi bin kisim taim bilong lukim ol pasin bilong ol Indonesia. Laip bilong ol i go olsem wanem? Mi bin painim ol Indonesia i save go long ol maket long nait. Ol i save baim ol sigaret na kain kain prut na mit, na ol lombo na kari, na kain laplap ol i kolim batik.


Tasol hia mi bin lukim namba wan taim sampela pipel i rabis tru na i no gat

haus na kaikai samting. Sampela pikinini i hanga-map tasol long mama bilong ol. Na pikinini na mama tupela wantaim i bun nating olgeta. Ol i askim tasol long liklik hap kaikai. Mi lukim sampela yangpela pipel na olpela tu i slip long arere bilong ol rot bilong wokabaut. Na mi lukim ol manki i lusim ol rabis haus bilong ol na i wok long mumutim sampela liklik hap kaikai namel long ol pipia i stap nabaut.

Mi lukim na mi no save. Ating em i pasin bilong kantri i bin go het kwik-taim. Sampela man i winim planti mani hariap. Na sampela man gen i kamap rabis olgeta.

Mi lukim ol dispela samting, na mi amamas long yumi Papua Niugini i no gat ol dispela kain wari. Mipela i no gat nau. Tasol mi no save. Bihain mipela i independen inap 32 yia, bai mipela i stap olsem wanem!

Poto long raithan i soim bikpela Borobudu haus lotu long Indonesia.



JVC MUSICAL PLEASURE


wanpela bilong yu stret




9437



9303E/R



9302E/R



9425

Olgeta samting yu laik painim insait long wanpela kaset redio rikoda, em yu ken painim long JVC.

Ol i no hevi, ol i isi long karim nabaut. Na ol i gat gutpela lautspika tru.

Yu go lukim long Hagemeyer bai yu inap painim wanpela bilong laik bilong yu stret. Na em bai stap planti yia moa. Yu laik win, yu kisim JVC.

9302E/R For people with get-up-and-go. Rich, clear sound, automatic level control, variable sound monitor, built-in microphone, flexible 3-way power system.

9303E/R Sturdy radio cassette recorder with best quality, solid state sound reproduction. Automatic level control, cue and review facilities. Mike mixing with independent volume control.

9437 Eye catching 3 Band Radio Cassette Recorder. Push button operation, built in microphone, auto stop, tape counter, tone control, variable monitor mixing.

9425 Advanced Radio Cassette Recorder featuring 2 speakers, Powerful "5" woofer 2" tweeter cellular horn, input mixing, auto stop, tape counter, built in microphone, AC/DC operation, auto head cleaner.



DISTRIBUTED IN PAPUA NEW GUINEA BY
HAGEMeyer (AUSTRALASIA) B.V.

For further information write to:-
P.O. Box 673, Madang Phone: 822445

P.O. Box 63, Rabaul Phone: 922633

P.O. Box 1428, Boroko Phone: 25 8144

P.O. Box 90, Lae Phone: 423200

JVC

OL SATEN HAILANS PIPEL LUKIM DISPELA PES

Mi amamas long bringim hia 1976/77 Rural Impruvmen Program wantaim baset bilong dispela yia. Mi bilip Gavman i soim tru as tingting long kirapim sindaun bilong ol pipel long ples.



(JULIUS CHAN) C.B.E., M.P.
Minister for Finance

PRIORITY NO.	SPONSOR	PROJECT	GRANT	LOCAL CONTRIBUTION	
				CASH	KIND
6-1	Area Authority	Rural Health Services	75,000	11,500	7,500
6-2	Southern Highlands Development	D.A Coffee Development	50,000	6,000	80,000
6-3	Koroba L.G.C.	Fugwa Swamp Drainage	8,000	2,000	-
6-4	Kopiago L.G.C.	Hewa Track	1,000	-	-
6-6	Komo L.G.C.	Komo-Tari Road	10,000	1,000	-
6-7	Kopiago L.G.C.	Tumbudu Road	5,000	500	-
6-8	Nipa L.G.C.	Nipa-Kutubu Road	5,000	700	1,500
6-9	Kutubu L.G.C.	Pimaga-Lake Kutubu Road	5,000	500	-
6-10	Poroma L.G.C.	Tamede Chillies	4,000	400	-
6-11	Kagua L.G.C.	Mendo Block Pig Barret	2,000	400	600
6-12	Pangia L.G.C.	Kauwo-Simbari Road	7,000	2,000	-
6-13	Tari L.G.C.	Tiri-Kireni Road	4,000	1,000	-
6-14	Margarima L.G.C.	Ugu-Yangari Road	2,000	300	-
6-15	Erave L.G.C.	Erave-Tsimbirigi Road	4,000	500	400
6-16	Primary Industry S.H.P.	Sugu Internal Roads	6,000	-	700
6-17	Mendi L.G.C.	Coffee Pulpers	300	80	-
6-18	Lai L.G.C.	Double Classroom Kip	1,550	300	350
6-19	Kopiago L.G.C.	Lagalyu Road	4,000	400	-
6-20	Pangia L.G.C.	Pangia-Eimbari Road	7,000	2,000	-
6-21	Tari L.G.C.	Hiwanda-Komo Road	4,000	500	500
6-22	Komo L.G.C.	Pami Agriculture Centre	3,000	300	-
6-23	Kutubu L.G.C.	Tege-Hegeso Road	4,000	400	-
6-24	Ialibu L.G.C.	Piambel-Kaupena Road	2,400	600	-
6-25	Koroba L.G.C.	Rural Health Centre Kelabo	1,800	450	200
6-26	Poroma L.G.C.	Community Centre Pombadl	1,000	100	1,140
6-27	Margarima L.G.C.	Panduaga Road	2,000	300	-
6-28	Erave L.G.C.	Tiri-Kerabi-Tsimbirigi Bridges	5,000	500	500
6-29	Nipa L.G.C.	Teachers House Pumberal	2,000	300	25
6-30	Mendi L.G.C.	Re-afforestation Kengaput	2,000	-	-
6-31	Kagua L.G.C.	Ibia Road	2,000	400	400
6-32	Lai L.G.C.	Classroom Munhiu	1,000	150	-
6-33	Kutubu L.G.C.	Coffee/Chillie Blocks	1,500	150	-
6-34	Pangia L.G.C.	Tealands Road	7,000	2,000	-
6-36	Komo L.G.C.	Bosavi Tract	3,000	-	-
6-37	Lai L.G.C.	Community Centre Wariba	1,000	150	-
6-38	Kagua L.G.C.	Bull Paddocks	3,000	600	600
6-40	Erave L.G.C.	Teacher House Mororongo	1,800	200	400
6-41	Mendi L.G.C.	Teachers House Kuma	2,250	750	-
6-42	Nipa L.G.C.	Classroom Pumberal	3,000	450	50
6-43	Margarima L.G.C.	Homaria-Songura Road	2,000	300	-
6-44	Poroma L.G.C.	Det-Pombadl Road	1,000	100	540
6-45	Kopiago L.G.C.	Alumi Road	3,000	300	-
6-46	Tari L.G.C.	Uruma-Benaria Road	5,000	500	500
6-47	Kutubu L.G.C.	Cattle Coffee Block Yabio	2,000	200	300
6-49	Poroma L.G.C.	Poroma-Tameda Road	2,000	200	50
6-50	Tari L.G.C.	Paijaka-North Basin Road	4,000	500	500
6-51	Erave L.G.C.	Paw-Marorongo Road	2,000	200	200
6-52	Nipa L.G.C.	Classroom Semin	3,000	450	50
6-53	Ialibu L.G.C.	Community Centre Ialibu	2,500	500	-
6-54	Koroba L.G.C.	Double Classroom Hedamari	1,360	340	300
6-55	Mendi L.G.C.	Teachers House Pingrip	2,250	750	-
6-56	Margarima L.G.C.	Sebiba-Spmgira Road	1,500	225	-
6-57	Pangia L.G.C.	Poreio Road	500	150	-
6-58	Kopiago L.G.C.	Yokond-Strickland Road	3,000	300	-
6-59	Lai L.G.C.	Munhiu-Imalhoma Road	1,000	150	-
6-60	Komo L.G.C.	Ierejaga Bridge	600	60	-
6-61	Margarima L.G.C.	Pyrethrum Project	2,000	300	-
6-62	Komo L.G.C.	Bosavi Mixed Farming	1,000	-	-
6-63	Kopiago L.G.C.	Market Garden	600	60	-
6-64	Kagua L.G.C.	Drain & Clear Mendo Block	1,000	200	400
6-65	Kutubu L.G.C.	Pimaga-Sorotage Track	1,000	100	-
6-66	Pangia L.G.C.	Lega Bridle Path	2,000	750	-
6-67	Koroba L.G.C.	Double Classroom Tadei	1,360	340	300
6-68	Mendi L.G.C.	Classroom Kuma	2,250	750	-
6-69	Nipa L.G.C.	Community Centre	2,000	300	550
6-70	Poroma L.G.C.	Community Centre Foiwara	1,500	150	500
6-71	Tari L.G.C.	Teachers House Hangapo	2,000	500	500
6-72	Ialibu L.G.C.	Double Classroom	2,400	2,400	-
6-73	Lai L.G.C.	Imilhoma-Wariba Road	1,000	150	-
6-74	Margarima L.G.C.	Market Garden	1,000	150	-
6-79	Mendi L.G.C.	Community Centre	3,000	750	-
6-80	Rari L.G.C.	Teachers House Hiwanda	1,167	500	500
6-81	Southern Highlands Area Authority	Maintenance	37,200	500	500
6-82	Southern Highlands Area Authority	Supervision	10,000	-	-

PAM I SAVE RAN LONG WARA TASOL

Planti taim yumi gat wara i stap klostu long ples tasol yumi mas go daunbilo long baret na karim i kam antap long wanpela liklik maunten, bai yumi kamap long ples. Em i hatwok tru.

I no gat planti ples i gat lektrik pawa bilong ranim pam wara. Na sapos yu laik baim wanpela moto bensin bilong ranim pam, em tu i kostim planti mani. Na bihain tu ensin bai lapun na i no ran moa. Na oltaim oltaim em i dringim bensin.

Tasol yumi laki, sampela saveman i bin painimaut dispela samting: sapos yumi sindaun namel long ol liklik maunten, bikpela maunten tu, em i gutpela ples tru bilong putim wanpela nupela kain pam i save ran nating long wara i stap insait long en. Wara i ranim em. Olsem em i gat bikpela nem "Haidrolik rem". Em i min wara i subim na em i ran.

Dispela kain pam em i no save dringim bensin samting na em i save lip-

timapim wara i go antap long teng o antap long liklik maunten, sapos ples bilong yu i stap antap long en.

Orait, nau dispela pam i wok olsem tasol. Wara i ran na i pulapim wanpela bikpela paip o mambu ain. Daunbilo long bikpela mambu i gat wanpela liklik dua. Wara i save goaut long dispela liklik dua. Tasol sapos wara i ran hariap moa, orait, em i save pasim dua. Taim dispela liklik dua i pas, em i subim wara i go antap long wanpela liklik mambu i stap arasait long dua. Orait, nau wanpela spring i opim liklik dua gen, na wara i ran i kam gen long bikpela mambu na i pasim bek. Em i mekim mekim olsem hariap hariap moa. Na oltaim moa na moa wara i lusim bikpela mambu na i go insait long liklik mambu.

I tru, liklik wara tasol i go insait long liklik mambu. Tasol em i go planti taim moa. Pam inap wok olgeta taim - long nait na long san. Long sampela

ples em inap long pulapim bikpela dram i gat 11,000 lita wara. Na em inap long subim wara i go antap long wanpela maunten, antap bilong em inap 150 mita.

Na i no gat bikpela wok o pe bilong lukautim dispela kain pam. Nogat. Yu mas lukaut tasol i no gat lip o liklik stik diwai o kain kain pipia i pasim maus bilong bikpela mambu, we wara i save kam insait. Na sampela taim yu


mas putim nupela hap gummi long liklik dua.

Wanpela man i save moa long wokim dispela kain pam, em Mista Fred Keating, Box 556, Goroka. Yu ken baim wanpela long em tu. Em i save wokim long Goroka stret. Na tu em i ken soim yu long pasin bilong ranim.

Narapela man i save moa long dispela kain pam, em Dick Burton, Unitech, Box 793, Lae.

Na sapos yu stap long Moresby, o klostu long en, yu ken rait i go long Viles Developmen Ofis, Box 6937, Boroko. O yu ken go long ofis bilong ol long bikpela haus bilong gavman long Waigani.

Sapos yu ritim dispela samting, orait, yu tokim sampela lida long ples bilong en. Dispela kain pam bai mekim laip bilong yupela long ples i isi moa na gutpela wara i ken kamap nating long gutpela. Na ol meri i save hatwok long karim wara i kam, bai ol i tenkyu tru long yupela.



**Buy the brand
you can trust**

maxell®



DISTRIBUTED IN PAPUA NEW GUINEA BY
HAGEMEYER (AUSTRALASIA) B.V.

P.O. Box 673, Madang
Phone: 82 2445

P.O. Box 63, Rabaul
Phone: 92 2633

P.O. Box 1428, Boroko
Phone: 25 6144



P.O. Box 90, Lae
Phone: 42 3200



The Phantom

®

By Lee Falk and Sy Barry





Kirap long Iephan, Pius Sangin (PNG), Laura del Rosario (Pilipin Ailan), Sabet Samen (PNG), Pater Rasmussen (Australia), Jackie Kohlhase (Samoa), Stobhan Turner (Nu Silan), Bernadette Japi (PNG), na Fe'ao Pasoni (Tonga), tupela i nildaun.

**OL WANSOLWARA
LONG MORESBY
MITING**

Bernie Meekel (Nu Silan), Crescentia Lementi (PNG), Jeanette Loanzon (Pilipin Ailan), Raymond Roberts (Palm Ailan), Laura (Pilipin Ailan), Peni Asi (Samoa), Sonia Mrva (Chile).

Borok nau bosim as ples



Mista Bernard Borok, em i provinsal komisina bilong Isten Hailans inap long 4-pela yia, i pinistaim nau na i bin go bek long as ples bilong em long Manus, we em bai kamap provinsal komisina nau.

Planti samting moa i bin kamap long Isten Hailans long taim Mista Borok i bosim dipela hap. Bikpela samting tru em provinsal gavman bilong ol.

Ating nau Mista Borok i traim statim provinsal gavman long Manus tu. Em i kisim save pinis long dispela kain wok.

LUS I TOK: KILIM OL STILMAN

Minista bilong ol Korektiv, Mista Pita Lus, i bin tok, long tingting bilong em, sapos ol plis i painim wanpela man i brukim haus na i go insait stil, ol i mas sutim em. Em i tok, man i stil, em i mas dai. Em i tok konstitusen i no gat strongpela lo bilong ol dispela samting. Em i tok lo i mas helpim gutpela man bilong PNG, olsem na em i mas mekim save tru long ol man nogut. Sapos nogat, bai planti pasin no-

gut i bosim dispela kantri.

Tasol man bilong helpim tok bilong gavman insait long ol kot, em Mista D.B. Egan, i tok em i no laikim dispela tingting bilong Mista Pita Lus. Em i tok, yumi no ken bihainim tingting bilong wanpela man tasol, taim yumi raitim wanpela lo. Yumi mas bihainim tingting bilong ol pipel, planti pipel.



BAIM WANTOK

Sapos yu wanpela yu laik kisim WANTOK niuspepa i kam long yu stret, orait, yu katim dispela tiket long sisis na salim i kam wantaim K8.00 na bai yu kisim 48 taim long dispela yia.

NEM:

ADRES:

.....

Nau yu putim sek inap long K8.00 i go wantaim dispela tiket insait long wanpela skin pas na yu salim i go long:

**WANTOK
P.O. BOX 1982
BOROKO**

Sapos yu laik baim moa olsem 10-pela WANTOK olgeta wik, mipela i gat spesel prais long dispela. Yu rait na askim mipela.

ATING YU SAVE.....

Long bikpela kibung bilong ol bikpela loman na minista bilong lo long ol Pasifik kantri, Mista Ebia Olewale, Minista bilong Jastis bilong yumi, i amamas tru long ol arapela kantri i laik kisim save long pasin bilong ranim ol viles kot long Papua Niugini. Long wanem PNG wanpela tasol long ol Pasifik kantri i bin go het gut wantaim ol viles kot. Ol arapela kantri i laik skul long mipela long ol pasin na wari na helpim i save kamap long ol viles kot.



Poto antap i soim Praim Minista Michael Somare long Jayapura wantaim Gavana Soetran bilong Irian Jaya, Misis Rudjito, na Mista Rudjito, tokman bilong Indonesia long Papua Niugini.

Daunbilo yumi lukim sampela memba bilong palamen bilong PNG i go long Japan taim Air Niugini i bin flai namba wan taim i go long Kagoshima. Man i sekan, em Sir Albert Maori Kiki (Minista bilong Foren Relesens na Tret), na Ledi Kiki bihain long em. Neks yumi lukim Mista Bruce Jephcott (Minista bilong Transpot). Na antap long leda em i Sir Tei Abal (Lida bilong Oposisen).

